

東明縣新志

天津趙元禮



李崔忠義祠記

左都御史李棠階
河南進士

聞之有功德於民者則祀之蓋以造社稷生民之福卽以得俎豆馨香之報而况集團
寇血戰捐軀者耶皖匪之亂延及畿疆東明縣布政司理問銜李公恆訓導銜崔公
於咸豐九年奉憲諭領城關團李公爲正團崔公副之二公之公正廉明老成諳練
爲衆心所悅服姑無具論邑城南濱黃河四鄉殷富恃長河之險多遷城內以故久爲
賊所窺伺二公佐縣令易公煥書清保甲選壯丁備器械明伍兩申孝弟忠信之義動
親上死長之心有警則沿河堵禦間亦渡河追剿是以南捻屢逼河岸而皆不得渡者
二公之力也十一年山東會匪滋事密邇東邑河北一帶俱被蹂躪勢甚猖獗五月五
日竄至東邑城下二公率衆禦賊殺死無算卒以衆寡不敵力竭陣亡其同時被害者
親丁二名戶丁一百餘名吁公團總耳非有守土之責也使當危急之時爲全軀之計
論者未必以不死責之而乃奮勇直前卒以身殉則其忠義之氣實足以愧天下後世
苟且貪生之流而豈獨爲一時所瞻仰耶是年其邑廩生田均平甫館余家並受業於

余余因得悉其事歲壬戌邑紳士二品銜吳德昌等十五人請建二公專祠並請酌獎其子弟赴都察院呈遞籲懇代奏余時爲總憲於是年八月初二日具奏奉

旨照四品文武官以下陣亡例議卹世襲雲騎尉准其於死事地建立專祠以彰忠節欽此欽遵行見廟貌巍峨簪纓累世庶幾忠魂以慰而二公雖死猶生矣嗣祠建成將立石以垂不朽李公之子際隆崔公之子重因田均以乞文於余余不獲以不文辭也爰濡筆而爲之記

重修義倉記

知縣 王崐崖 南河舉人

嘗考周官遺人掌邦之委積倉人掌粟入之藏後世倉儲防焉漢有常平倉穀賤則增價糴之以利農穀貴則減價糴之以利民緩急相需歷代相因誠救荒之善策也迨沿習既久或移爲軍國之需或侵漁官司之手甚至蠹吏富商相倚爲奸流弊百出常平者不得其平此奉行不善非建倉之過也唐宋元明有廣惠倉豫儲倉皆準常平遺意而尤善者莫過於義倉義倉起於隋初歲豐收之歲歛散之民自司其出入故名曰義宋朱子建社倉隨年斂放初得米六百石行之十年得米二千石其法之善亦準於義倉余於同治十年春正來任斯土下車伊始卽詢義倉一節僉云舊有常平在縣治內有社倉四分建各鄉經前邑侯華星來修建義倉併常平義倉爲一處復儲粟數千石設立倉正副司其管鑰出陳易新數十年於茲乙卯歲黃水爲災哀鴻遍野開倉賑粟黎民借以生活得免遷徙流離者數萬家今雖倉廩久廢蓄儲無存而感念疇昔邑士民猶稱道善政不衰予聞之慨然曰華公此舉誠善舉也今已湮而不存後日再遇饑

饑民何以堪適逢上憲札委勸捐倉儲爰邀寅僚鄉紳商議復始首先捐穀壹百石以爲之倡四民響應不數月間得粟一千八百石建倉十三間暨周圍門牆一律整齊復選公正殷實者司其事是役也非敢矜策之善也我

國家叠沛賑恩各大憲關心民膜司牧者正宜早爲之防厚爲之蓄使東邑長此豐年備而不用則更幸甚倘偏災偶及嗷嗷待哺之衆借以稍解其饑困後日之念今不猶如今日之念華公也哉且予更有請者東明義倉址基宏敞目前值凋敝之餘民力困乏未能遽復舊制後之宰斯土者應有同心加以恢擴成此巨規酌盈劑虛實心奉行俾倉儲充裕拯濟災歉救荒之策一歸至善庶信斯言之不謬也是又余所殷殷企望也夫爰立石而爲之記

捐辦書院留養局生息成本碑記

王岷崖

嘗聞興養與立教並重而養所宜急莫急於窮民教所宜先莫先於秀士留養書院二事誠司牧者之首務也同治十年春余奉檄來涖斯邑爾時書院粗有規模留養局則廢缺無存矣是年冬奉府憲檄勸捐倉穀以爲窮民計當卽邀同城文武及紳耆等分赴各鄉愷切勸諭合邑士庶亦深明大義踴躍輸將不數月捐穀一千八百石每石並捐制錢肆百文修理倉廩嗣於來年春將倉廩大門圍牆一律修齊捐收穀石如數存儲以備不虞至於書院向有地租一頃按月課試生童膏火飯食一切需用俱由是出惟主講無人所有課卷悉由公餘之暇漫爲評定甲乙自顧荒疎已久恐不足以悅服生童之心因捐廉五百千文發商生息延請山長以爲多士矜式然涓滴之水未能廣潤終覺歉然六月初旬道憲奉制憲面諭飭辦留養書院二事適符夙願趕卽遵照安速辦理兩月間捐制錢捌千串除修留養局花費外以三分歸留養局以七分歸書院其歸留養局者按照人數多寡隨時酌定發給書院生則分超特等各八名童則分上

中取各八名酌定膏火分別獎賞教養並舉士庶競秀行見既富方穀人材輩出甲科連綿在指顧間矣謂非燃火達泉者有以助之哉因弁數言並規條數則付董事范承嬰等俾刊諸石以誌緣起非敢詡教養也庶爲留心教養者聊見一斑云爾

重建漆陽書院記

知縣 褚璫 江夏人

東明書院肇始於隆慶中隸學校側顏曰扶義 國家定鼎之七年沒於河道光丁亥閱一百七十餘禩矣前尹華侯始改建於城巽方卽今漆陽書院是也同治癸亥復被河患決城而北陵谷於俄傾而斯院已廢河決後八歲不佞移權縣事迺因搢紳請謀是役爲白於上官售向所籍叛產以爲資不佞復募金以繼之門序正位講藝之堂祀神之閣棲士之舍皆足以及庖湍榻几器用之屬各以序置經始於庚午秋落成於其次歲之六月規模一視昔而址高於舊丈有咫繼是可無虐波臣矣役既畢復徇搢紳請以紀之方書院之創立也聚一邑之士相與切劘砥礪於其中繇是儲才而育德甚盛事也迨一敝於河積百數十年不能振幸而復矣未數十年又爲河所敝嗚呼其興也何難而廢也何易歟今又幸而復矣或者仍厯異時之憂而不佞有以卜其必不然者於斯院程功之速而知人心所固結足以維持於不敝也何也夫河患猶未遠矣流亡者未盡復瘡痍者未盡起農夫未盡耕於隴商賈未盡載於途惟茲雅頌絃歌之士

已羣然思所自立油然生其嚮善好學之心而猶苦無都肆之所以復故物於是有
心者不憚竭經營拮据之勞至未遑室家以首興是役則是士之急於自立與所以謀
遂自立之士者皆有固結不容已之情而後斯院之成之速迺出於固結而不容以已
夫聚賢士大夫之心皆固結而不容已於此曾未能消意外經久遠以維持於不敝者
世固未之有也僅執尋丈之高下以爲說抑末已抑攷之邑乘劉桓公里居教授弟子
恆五百餘人每春秋行禮縣宰輒率吏屬而視之當世以爲榮邑有隱君子者出而教
授以步武先民不佞雖未及隨諸生執經問難於其間而後之有司於茲觀雅化之成
安見古今人不相及也不亦美乎不亦美乎凡與於斯役之董事捐資各紳戶例得備
書并貞他珉以示來者是爲記

重修城隍廟記

知縣 錢錫采 錢塘舉人

邑城自同治二年五月二十三日酉時黃水從南門刷入城內水深十數尺摧垣漂木官廨廟宇一時冲沒殆盡而邑廟遂爲平地迄今三十有四年矣錫采涖任斯土謁廟僅甕牖一區爲神棲止所拜跪於露地幾野鬼叢祠之不若乃喟然嘆曰夫神之鑒觀斯民也無形而民之敬畏吾神也恆寄無形於有形况禦災捍患彰善瘝惡於神乎司之而或無以肅觀瞻顯赫濯使蚩蚩者不知有天地神明之懼而日肆其慘毒戾狠之心此亦人心風教之隱憂也亟謀於城紳諸君并四鄉之賢士大夫出簿籍分勸布施錫采首捐奉以倡率之工將興先掘舊基深丈許得神像碑鼎及磚石之未經損壞者昇而出之噫是可知當日陷溺之患之深而沈埋之日之久有如是者於是鳩工庀材經始於光緒丙申三月二十六日落成於十一月二十日規模照舊制工程直不啻創造蓋舊存惟灶君廟凡正殿及兩廊大門戲樓影牆及土地祠皆平地起造視重修尤費鉅工艱辛賴任事諸人不辭勞怨得以蒞事錫采方量移萬全不獲常治斯邑竊願

神之呵護吾民永保無疆使吾民壽攷而安康則邀貺於神明又豈徒錫案一人之幸也歟是爲記

創建魁樓碑記

國朝張鼎梅進士涇陽人

東明屬畿南邊邑距大河百里爲界壤接中州東連齊魯北拱神京旺氣千里蜿蜒而來俱凝聚於此以故人文蔚起明興三百年科第連綿街衢石坊巍然鱗次遠近稱爲天雄文獻冠冕自我朝龍飛六十年來登進寥寥豈氣運有盛衰歟抑培養振興之無其人耶乙酉春余奉

天子命來蒞茲土首以振拔人才爲務遂聯龍山大社諸子以文章道義相砥礪諸子亦敬業樂羣欣然謂數百年來邑中無此曠舉詎意是科鄉試諸子復報罷余每用惻然既而有堪輿家言邑東南地形平衍氣多渙散當作魁樓於城之巽隅其爲補益良多而一時紳士亦合詞爲請余謂天人相應之理捷如影響况天下通邑大都以及州郡僻壤所稱文閣魁樓在在而有無非助文脈壯觀瞻何至漆水而獨不然余於丙戌秋乃率寮屬捐俸以倡之諸紳士亦各量力輸貲以助之爰卜爰築爰庀爰鳩樓成而位魁像其中筆峯插天金碧耀目卽偕諸紳士擇吉灌獻執事有恪入精意以事神

於昭以下監天人會合理自不爽人傑地靈方興未艾余嘗登樓賦詩有阿閣凌城表
登臨望落暉風雲連海岱氣象壯邦畿之句亦可見斯樓之大凡已將來天祿石渠之
彥接武雲衢時或登高作賦觴咏於斯樓而因憶始作之人知爲舊令西京嘯月子嗣
而葺之益增壯麗爲東邑美觀瞻而毓英靈則庶乎魁樓之不朽而余名亦藉貞珉以
傳永久矣謹泚筆而爲之記

重修單將軍廟記

國朝程允仁 長洲人

縣舍東北偏單將軍墓顛向有祠宇三楹二廢一存稽諸邑乘猶是萬歷間竇公傑所建越三十載張公師繹增修之然其一亦上漏下溼蠹腐不可收拾余惟將軍生隋唐間事王世充號飛將克終臣節固一時雄傑藏衣冠之所豈宜如是又嘗得諸士庶請嘖嘖道將軍英靈陟降庇佑此方久而未艾且多奇驗康熙初役夫畚鍤及墓尺許見鉄盜大如斗朗耀眩人目愈掘愈下終不可得其一徵也余間有一二爲民祈禱事齋心致祝亦無不應於戲將軍自隋唐距今千餘年矣其精英赫濯猶如此其欽信在人猶如此是安得與暮楚朝秦齷齪瑣瑣之徒生同狗彘沒隨草木俱腐者比類而論也哉爰出俸橐因其舊地鳩工庀材屋仍曩數盡易而新之以妥其靈以順民心以永烝嘗於勿替焉時雍正六年四月辛卯日經始五月甲寅日落成是爲記

重修 崇聖殿 大成殿記

國朝 徐開第
進士 德州人

古稱聖人天下之身也余以聖人又身之心也有心無身者乎有身無室者乎然則取

聖居而整葺之亦身我心而室我身耳余初任寧津再任永清胥以聖居爲兢兢乾隆五年冬調茲邑登

夫子堂見規模壯麗用心樂之度歲詢所貯新琉璃瓦知爲訓導王諱無極捐備修崇聖殿邑紳李諱臺董其役苦乏工資余任其事捐柒拾金李亦勛助並前敬一亭亦竣竊念

大成殿故明迄今雖歲久兩工難並姑支撐需至秋嗚呼爲義不勇

夫子見之矣四月用傾東偏瓦椽墜地警余乎何速也仍與兩學先生李紳謀之憐余廉且日淺欲募余曰心無身身無室不能一朝寒氈青燈拮据播兩築室道旁矣余任之李督之教諭包諱有章訓導王諱無極典史丁諱均把總杜諱成功分日

監之閱月而成不過又費貳百餘金丹碧輝煌用妥

聖神或曰是功德也宜記余以身吾心而室吾身云爾是爲記